

AKTA PEMBANGUNAN SUKAN 1997

MAJLIS OLIMPIK MALAYSIA

(AKTA 576)

SUSUNAN SEKSYEN

BAHAGIAN I

PERMULAAN

Seksyen

1. Tajuk ringkas, pemakaian dan mula berkuatkuasa.
2. Tafsiran.

BAHAGIAN II

PEMBANGUNAN SUKAN

3. Garis panduan berhubung dengan pembangunan sukan.
4. Persatuan, dll. hendaklah berunding dan menyelaraskan dengan Menteri.
5. Kementerian Kerajaan yang lain, dll. hendaklah berunding dengan Menteri.
6. Badan penyelarasan.
7. Pembangunan sains sukan.

BAHAGIAN III

MAJLIS OLIMPIK MALAYSIA

8. Jawatankuasa Olimpik Kebangsaan.
9. Pemakaian Akta bagi Majlis Olimpik Malaysia.

BAHAGIAN IV

PENTADBIRAN AKTA

10. Pelantikan Pesuruhjaya, dll.
11. Kuasa Pesuruhjaya untuk mendaftarkan badan sukan.
12. Kuasa Pesuruhjaya untuk mengendaki pendedahan maklumat.
13. Kuasa tambahan Pesuruhjaya.
14. Arahan oleh Menteri.

BAHAGIAN V
PENDAFTARAN DAN PENYELIAAN
BADAN SUKAN

Seksyen

15. Permohonan supaya didaftarkan untuk menjalankan aktiviti.
16. Badan sukan yang didaftarkan di bawah Akta Pertubuhan 1966.
17. Pendaftaran badan sukan.
18. Perakuan pendaftaran.
19. Alasan bagi keengganan untuk mendaftarkan.
20. Pembatalan atau penggantungan pendaftaran oleh Pesuruhjaya.
21. Rayuan.
22. Arahan untuk meneruskan fungsi badan sukan.
23. Prosedur dalaman bagi penyelesaian pertikaian.
24. Perujukan pertikaian kepada Menteri.
25. Akibat keengganan untuk mendaftarkan atau pembatalan atau penggantungan pendaftaran.
26. Peraturan-peraturan berkenaan dengan badan sukan.

BAHAGIAN VI
PANEL PENASIHAT SUKAN

27. Penubuhan Panel Penasihat Sukan.
28. Pelantikan anggota Panel Penasihat Sukan.
29. Syor kepada Menteri.
30. Kuasa Panel Penasihat Sukan untuk menghendaki pendedahan maklumat.
31. Tiada tindakan boleh diambil terhadap Panel Penasihat Sukan.
32. Peraturan-peraturan berkenaan dengan Panel Penasihat Sukan.

BAHAGIAN VII

PELBAGAI

33. Kelulusan untuk menjadi tuan rumah pertandingan antarabangsa.
34. Penggunaan kaedah dan garis panduan antarabangsa yang diiktiraf untuk pertandingan.

Seksyen **AKTA PEMBANGUNAN SUKAN 1997**

35. Kelulusan Menteri dikehendaki bagi "Sukan Malaysia"
36. Syarikat hendaklah memohon untuk mendapatkan lesen untuk beroperasi
37. Pindaan Jadual
38. Peraturan-peraturan
39. Kesalahan am dan kesalahan yang bersangkut paut dengannya
40. Perlindungan bagi orang dilantik, anggota jawatankuasa, dll.
41. Kuasa am Menteri.
42. Peruntukan peralihan.
43. Pencegahan anomali.

JADUAL-JADUAL.

Dalam Akta ini, melainkan jika konteksnya menunjukkan sebaliknya, maka yang di maksudkan oleh istilah-istilah yang terdapat dalam Akta ini bererti seperti yang ditunjukkan dalam jadual-jadual yang terdapat dalam Akta ini.

Ruangan ini dibiarkan kosong dengan sengaja.

AKTA PEMBANGUNAN SUKAN 1997

(Akta 576)

SUATU Akta untuk menggalakkan dan memudahkan pembangunan dan pentadbiran sukan di Malaysia dan untuk memperuntukkan perkara-perkara yang bersampingan dengannya.

[1.1.1998-PU (B) 9/98: *Semenanjung Malaysia*;
10.7.2003-PU (B) 211/03: *Sabah, Sarawak & W.P. Labuan*]

MAKA INILAH DIPERBUAT UNDANG-UNDANG oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

BAHAGIAN I PERMULAAN

1. Tajuk ringkas, pemakaian dan mula berkuatkuasa.

(1) Akta ini bolehlah dinamakan **Akta Pembangunan Sukan 1997** dan hendaklah terpakai di seluruh Malaysia.

(2) Akta ini hendaklah mula berkuatkuasa pada tarikh atau tarikh-tarikh yang ditetapkan oleh Menteri melalui pemberitahuan dalam *Warta*; dan Menteri boleh menetapkan tarikh yang berlainan bagi mula berkuatkuasanya peruntukan yang berlainan dalam Akta ini dan bagi pemakaian Akta ini bagi bahagian yang berlainan di Malaysia.

2. Tafsiran.

Dalam Akta ini, melainkan jika konteksnya menghendaki makna yang lain—

“ahli sukan” ertinya peserta sesuatu sukan, termasuk seorang atlet;

“aktiviti sukan”, berhubungan dengan sesuatu sukan, termasuklah—

- (a) penganjuran pertandingan, seminar, klinik atau kursus untuk sesuatu sukan;
- (b) penghantaran peserta ke pertandingan atau acara sukan; dan
- (c) apa-apa aktiviti lain yang bersampingan atau berkaitan dengan sesuatu sukan;

“badan sukan” ertinya sesuatu persatuan, kelab, pertubuhan atau syarikat yang bertindak sebagai badan pengelola atau badan perwakilan suatu sukan di Malaysia sama ada di peringkat daerah, Negeri atau kebangsaan, sama ada atau tidak persatuan, kelab, pertubuhan atau syarikat itu hanyalah anggota gabungan bagi persatuan, kelab, pertubuhan atau syarikat yang lain;

“lesen” ertinya lesen yang dikeluarkan oleh Pesuruhjaya di bawah seksyen 36;

“Majlis Sukan Negeri” ertinya Majlis Sukan Negara Malaysia yang ditubuhkan di bawah Akta Majlis Sukan Negara Malaysia 1971¹;

“Menteri” ertinya Menteri yang dipertanggungjawabkan dengan tanggungjawab bagi sukan;

“Negeri” termasuklah Wilayah-Wilayah Persekutuan Malaysia;

“Panel Penasihat Sukan” ertinya panel yang ditubuhkan di bawah seksyen 27;

“pemegang jawatan”, berhubungan dengan suatu badan sukan, termasuklah—

- (a) anggota mana-mana jawatankuasa kecil atau badan lain yang ditubuhkan atau dibentuk oleh badan pengelola suatu badan sukan, atau oleh badan pengelola cawangan badan sukan itu;

¹Akta 29.

(b) mana-mana orang yang bertanggungjawab sehingga apa-apa takat bagi pengurusan apa-apa urusan, atau penjalanan apa-apa aktiviti, suatu badan sukan atau mana-mana cawangan badan sukan itu; dan

(c) mana-mana orang yang dilantik atau dibenarkan untuk mewakili, atau untuk bertindak bagi pihak, suatu badan sukan atau mana-mana cawangan badan sukan itu, dalam apa-apa perkara, selain daripada orang yang diambil kerja oleh badan sukan itu untuk mewakili, atau bertindak bagi pihak, badan sukan itu atau mana-mana cawangan badan sukan itu atas sifat profesionalnya atau melalui perkiraan kontrak;

“perakuan” ertinya perakuan pendaftaran yang dikeluarkan di bawah seksyen 18;

“Pesuruhjaya” ertinya Pesuruhjaya Sukan yang dilantik di bawah seksyen 10 dan termasuklah seorang Pesuruhjaya Sukan Rantau, Timbalan Pesuruhjaya Sukan atau Penolong Pesuruhjaya Sukan;

“sukan” ertinya mana-mana aktiviti yang disenaraikan dalam Jadual Pertama;

“syarikat” mempunyai erti yang sama seperti yang diberikan kepada ungkapan itu dalam Akta Syarikat 1965¹ dan termasuklah “perbadanan” sebagaimana yang ditakrifkan dalam Akta itu.

BAHAGIAN II PEMBANGUNAN SUKAN

3. Garis panduan berhubung dengan pembangunan sukan.

(1) Tertakluk kepada subseksyen (2), Menteri adalah bertanggungjawab bagi mengadakan atau mengeluarkan garis panduan berhubung dengan pembangunan sukan termasuk rancangan pembangunan jangka panjang bagi ahli sukan, jurulatih dan pentadbir dan pegawai sukan pada semua peringkat.

¹Akta 125.

(2) Menteri tidak boleh mengadakan atau mengeluarkan apa-apa garis panduan di bawah subseksyen (1) jika sudah ada garis panduan atau kaedah antarabangsa tentang perkara yang sama.

4. Persatuan, dll. hendaklah berunding dan menyelaras dengan Menteri.

Semua persatuan, agensi atau badan yang terlibat dalam sukan hendaklah berunding dan menyelaras dengan Menteri berhubung dengan apa-apa perkara sukan sebagaimana yang ditetapkan oleh Menteri dalam peraturan-peraturan.

5. Kementerian Kerajaan yang lain, dll. hendaklah berunding dengan Menteri.

(1) Tertakluk kepada subseksyen (2), tiap-tiap Kementerian Kerajaan atau badan kerajaan yang lain di peringkat Persekutuan, Negeri atau tempatan boleh menjalankan aktiviti sukan atau aktiviti yang berhubung dengan pendidikan jasmani atau sukan, termasuk pembangunan kualiti kepimpinan dalam pendidikan jasmani dan sukan.

(2) Menteri boleh, melalui pemberitahuan bertulis, menghendaki sesuatu Kementerian Kerajaan atau badan kerajaan yang disebut dalam subseksyen (1) supaya berunding dan menyelaras dengannya berhubung dengan aktiviti yang disebut dalam subseksyen itu.

(3) Dalam seksyen ini, "Kementerian" tidak termasuk Kementerian Belia dan Sukan.

6. Badan penyelaras.

Menurut peranannya sebagaimana yang diperuntukkan dalam Akta Majlis Sukan Negara Malaysia 1971, Majlis Sukan Negara hendaklah menjadi badan penyelaras menyeluruh bagi semua badan sukan untuk menggalakkan dan membangunkan sukan di Malaysia.

7. Pembangunan sains sukan.

Menteri boleh, ke arah membangunkan sukan, mengambil segala tindakan yang perlu untuk menggalakkan pembangunan sains sukan di institusi pendidikan tinggi di Malaysia dan bagi maksud ini boleh memberikan segala bantuan yang difikirkannya perlu.

BAHAGIAN III

MAJLIS OLIMPIK MALAYSIA

8. Jawatankuasa Olimpik Kebangsaan.

(1) Majlis Olimpik Malaysia adalah diiktiraf sebagai Jawatankuasa Olimpik Kebangsaan bagi Malaysia oleh Jawatankuasa Olimpik Antarabangsa.

(2) Majlis Olimpik Malaysia adalah bertanggungjawab untuk memastikan bahawa penyertaan Malaysia dalam Sukan Olimpik, Sukan Asia, Sukan Komanwel, Sukan Asia Tenggara dan pertandingan olahraga antarabangsa yang lain adalah mengikut kaedah-kaedah dan peraturan-peraturan Jawatankuasa Olimpik Antarabangsa, Majlis Olimpik Asia, Persekutuan Sukan Komanwel, Persekutuan Sukan Asia Tenggara dan badan sukan antarabangsa yang lain yang Majlis Olimpik Malaysia adalah anggota gabungannya.

9. Pemakaian Akta bagi Majlis Olimpik Malaysia.

Tertakluk kepada Akta ini, peruntukan Akta ini yang terpakai bagi badan sukan adalah sama terpakai bagi Majlis Olimpik Malaysia dan sebutan mengenai "badan sukan" dalam peruntukan itu termasuklah sebutan mengenai Majlis Olimpik Malaysia.

BAHAGIAN IV
PENTADBIRAN AKTA

10. Pelantikan Pesuruhjaya, dll.

Menteri boleh melantik seorang Pesuruhjaya Sukan dan sekian bilangan Pesuruhjaya Rantau, Timbalan Pesuruhjaya dan Penolong Pesuruhjaya Sukan dan pegawai dan pengkhidmat lain yang difikirkannya perlu bagi pentadbiran wajar Akta ini.

11. Kuasa Pesuruhjaya untuk mendaftarkan badan sukan.

(1) Pesuruhjaya hendaklah mempunyai kuasa yang berikut:

(a) mendaftarkan atau enggan mendaftarkan—

(i) mana-mana persatuan, kelab, pertubuhan atau syarikat sebagai badan sukan;

(ii) mana-mana badan sukan yang didaftarkan di bawah Akta Pertubuhan 1966¹;

(b) mengenakan apa-apa syarat yang difikirkannya patut semasa pendaftaran sesuatu badan sukan; dan

(c) membatalkan atau menggantung pendaftaran sesuatu badan sukan.

(2) Pesuruhjaya boleh, secara bertulis, mewakili mana-mana kuasanya di bawah subseksyen (1) kepada mana-mana orang atau jawatankuasa yang dibentuk oleh Pesuruhjaya bagi maksud itu dan boleh menetapkan secara bertulis apa-apa prosedur dan peraturan yang difikirkannya perlu bagi penjalanan kuasa yang diwakilkan sedemikian.

12. Kuasa Pesuruhjaya untuk menghendaki pendedahan maklumat.

(1) Pesuruhjaya boleh mengarahkan mana-mana orang supaya mendedahkan apa-apa maklumat kepadanya dan mengemukakan apa-apa laporan dan dokumen dalam pengetahuannya atau dalam miliknya sebagaimana yang difikirkannya perlu bagi maksud penjalanan mana-mana kuasa dan fungsi Pesuruhjaya di

¹Akta 335.

bawah Akta ini dan dia boleh selanjutnya mengarahkan mana-mana orang yang difikirkannya perlu supaya hadir di hadapannya untuk membolehkannya menjalankan kuasa dan fungsinya di bawah Akta ini.

(2) Mana-mana orang yang—

- (a) tidak mematuhi arahan Pesuruhjaya di bawah subseksyen (1);
- (b) mendedahkan apa-apa maklumat yang diketahuinya adalah palsu; atau
- (c) mengemukakan suatu laporan atau dokumen yang diketahuinya adalah palsu,

adalah melakukan suatu kesalahan dan apabila disabitkan boleh didenda tidak melebihi lima ribu ringgit atau dipenjarakan selama tempoh tidak melebihi enam bulan atau kedua-duanya.

13. Kuasa tambahan Pesuruhjaya.

Sebagai tambahan kepada kuasa, tugas dan fungsi yang diberikan kepada Pesuruhjaya oleh Akta ini dan apa-apa peraturan yang dibuat di bawahnya, Pesuruhjaya hendaklah mempunyai dan boleh menjalankan segala kuasa, menunaikan segala tugas dan melaksanakan segala fungsi yang perlu bagi maksud menguatkuasakan dan menjalankan peruntukan Akta ini.

14. Arahan oleh Menteri.

(1) Menteri boleh memberi Pesuruhjaya apa-apa arahan yang tidak tak konsisten dengan peruntukan Akta ini tentang perjalanan dan pelaksanaan kuasa dan fungsinya berhubungan dengan mana-mana badan sukan dan Pesuruhjaya hendaklah menguatkuasakan apa-apa arahan sedemikian.

(2) Pesuruhjaya hendaklah memberi Menteri apa-apa maklumat berhubungan dengan mana-mana badan sukan sebagaimana yang dikehendaki oleh Menteri dari semasa ke semasa.

BAHAGIAN V
PENDAFTARAN DAN PENYELIAAN
BADAN SUKAN

15. Permohonan supaya didaftarkan untuk menjalankan aktiviti.

(1) Tiap-tiap badan sukan hendaklah memohon kepada Pesuruhjaya supaya didaftarkan di bawah Akta ini untuk menjalankan apa-apa aktiviti sukan.

(2) Tiada badan sukan boleh menjalankan mana-mana aktiviti yang disebut dalam subseksyen 25(1) sehingga dan melainkan jika ia telah didaftarkan di bawah Akta ini.

16. Badan sukan yang didaftarkan di bawah Akta Pertubuhan 1966.

[Pind. PU (A)
170/98] Mana-mana badan sukan yang didaftarkan di bawah Akta Pertubuhan 1966 hendaklah, pada tarikh mula berkuatkuasanya Akta ini, terhenti berdaftar di bawah Akta Pertubuhan 1966 dan hendaklah, dalam masa lima bulan dari tarikh itu, memohon kepada Pesuruhjaya supaya didaftarkan di bawah Akta ini untuk menjalankan apa-apa aktiviti sukan; dan mana-mana badan sukan sedemikian hendaklah terus beroperasi sebagai suatu badan sukan sehingga diberitahu selainnya oleh Pesuruhjaya.

17. Pendaftaran badan sukan.

Apabila diterima permohonan oleh suatu badan sukan yang disebut dalam seksyen 15 atau 16, Pesuruhjaya boleh—

- (a) mendaftarkan badan sukan itu apabila diterima apa-apa fee yang ditetapkan oleh peraturan-peraturan; atau
- (b) enggan mendaftarkan badan sukan sedemikian.

18. Perakuan pendaftaran.

(1) Pesuruhjaya, apabila mendaftarkan suatu badan sukan di bawah seksyen 17—

(a) hendaklah mengeluarkan suatu perakuan pendaftaran dalam bentuk yang ditetapkan kepada badan sukan itu; dan

(b) boleh mengenakan apa-apa syarat yang difikirkannya patut ke atas badan sukan itu.

(2) Suatu perakuan pendaftaran, melainkan jika dibuktikan telah dibatalkan kemudiannya, hendaklah menjadi keterangan konklusif bagi segala maksud bahawa badan sukan itu telah didaftarkan dengan sewajarnya oleh Pesuruhjaya di bawah Akta ini.

19. Alasan bagi keengganan untuk mendaftarkan.

(1) Pesuruhjaya boleh enggan mengeluarkan perakuan pendaftaran kepada suatu badan sukan melainkan jika—

(a) dia berpuas hati bahawa badan sukan itu ialah organisasi bukan berbentuk politik bagi penggalakan dan pembangunan sukan di Malaysia; atau

(b) tertakluk kepada subseksyen (2), perlembagaan atau kaedah-kaedah badan sukan itu, kecuali Majlis Olimpik Malaysia, mengandungi peruntukan bagi segala perkara yang dinyatakan dalam Jadual Kedua atau Jadual Ketiga, mengikut mana-mana yang terpakai, atau apa-apa perkara lain yang semunasabahnya dikehendaki oleh Pesuruhjaya.

(2) Jika perkara-perkara yang dinyatakan dalam Jadual Kedua atau Jadual Ketiga, mengikut mana-mana yang terpakai, tidak terkandung dalam perlembagaan atau kaedah-kaedah sesuatu badan sukan yang dahulunya didaftarkan di bawah Akta Pertubuhan 1966, perkara-perkara ini hendaklah bagi maksud perenggan (1)(b) disifatkan telah terkandung dalam perlembagaan atau kaedah-kaedah badan sukan itu; tetapi badan sukan itu hendaklah, tidak lewat daripada enam bulan selepas pendaftarannya, meminda perlembagaan atau kaedah-kaedahnya supaya segala perkara yang dinyatakan dalam Jadual Kedua atau Jadual Ketiga, mengikut mana-mana yang terpakai, diperuntukkan.

20. Pembatalan atau penggantungan pendaftaran oleh Pesuruhjaya.

(1) Pesuruhjaya boleh membatalkan atau menggantung pendaftaran sesuatu badan sukan jika Pesuruhjaya berpuas hati bahawa badan sukan itu—

- (a) telah didaftarkan akibat daripada suatu fraud atau kesilapan atau salah nyataan dalam apa-apa perkara material;
- (b) telah tidak mematuhi mana-mana syarat yang dikenakan oleh Pesuruhjaya di bawah seksyen 18;
- (c) telah melanggar mana-mana peruntukan Akta ini atau apa-apa peraturan yang dibuat di bawahnya;
- (d) tidak aktif atau bukan lagi entiti yang patut dan wajar didaftarkan untuk mewakili sukannya di dalam mana-mana Negeri atau di Malaysia;
- (e) menghindar pembangunan sukan tertentu itu dan demi kepentingan awam pendaftarannya patut dibatalkan atau digantung;
- (f) tidak meremedikan, atau cuai untuk meremedikan, apa-apa salah amalan, salah laku atau luar aturan di pihak pemegang jawatannya atau anggotanya dalam tempoh yang ditentukan dalam notis bertulis yang diberikan oleh Pesuruhjaya; atau
- (g) tidak aktif, tidak bekerjasama, atau menjadi penghalang, dalam pelaksanaan peraturan, dasar atau garis panduan yang dibuat di bawah atau menurut kuasa-kuasa di bawah Akta ini.

(2) Sebelum membatalkan atau menggantung pendaftaran sesuatu badan sukan di bawah subseksyen (1), Pesuruhjaya hendaklah memberi badan sukan itu peluang untuk mengemukakan sebab, jika ada, menentang pembatalan atau penggantungan yang dicadangkan itu.

21. Rayuan.

(1) Mana-mana badan sukan yang terkilan dengan keputusan Pesuruhjaya—

(a) untuk enggan mendaftarkan badan sukan itu;

(b) untuk mengenakan syarat-syarat ke atas pendaftaran badan sukan itu; atau

(c) untuk membatalkan atau menggantung pendaftaran badan sukan itu,

boleh, dalam tempoh tiga puluh hari dari tarikh pemberitahuan keputusan Pesuruhjaya itu, merayu kepada Menteri dan keputusan Menteri tentang rayuan itu adalah muktamad.

(2) Sebelum membuat apa-apa keputusan di bawah subseksyen (1), Menteri boleh merujuk perkara itu kepada Panel Penasihat Sukan.

22. Arahan untuk meneruskan fungsi badan sukan.

Menteri boleh, sementara menunggu keputusannya tentang rayuan di bawah subseksyen 21(1), memberikan apa-apa arahan untuk membolehkan badan sukan itu meneruskan fungsinya dan boleh melantik suatu jawatankuasa *ad hoc* untuk menguruskan hal-ehwal badan sukan itu bagi suatu tempoh yang tidak melebihi dua belas bulan.

23. Prosedur dalaman bagi penyelesaian pertikaian.

Tiap-tiap badan sukan hendaklah menyelesaikan apa-apa pertikaian yang timbul di kalangan anggotanya atau dengan jawatankuasa atau badan pengelolanya mengikut prosedur dalaman yang ditetapkan dalam peraturan-peraturan.

24. Perujukan pertikaian kepada Menteri.

(1) Jika sesuatu pertikaian tidak dapat diselesaikan di bawah prosedur dalaman yang disebut dalam subseksyen 23(1), maka mana-mana anggota yang terkilan atau badan sukan itu sendiri boleh merujuk pertikaian itu kepada Menteri untuk penyelesaian.

(2) Menteri boleh, atas nasihat Pesuruhjaya dan pada bila-bila masa difikirkannya perlu dan suaimanfaat, menghendaki mana-mana badan sukan supaya merujuk apa-apa pertikaian kepadanya untuk penyelesaian walaupun pertikaian itu tidak dirujuk kepadanya di bawah subseksyen (1).

(3) Keputusan Menteri di bawah seksyen ini adalah muktamad; tetapi Menteri boleh mendapatkan pendapat Panel Penasihat Sukan atau mana-mana jawatankuasa yang lain yang ditubuhkan oleh Menteri bagi maksud itu sebelum membuat keputusannya.

25. Akibat keengganan untuk mendaftarkan atau pembatalan atau penggantungan pendaftaran.

(1) Apabila Pesuruhjaya enggan mendaftarkan mana-mana badan sukan di bawah seksyen 17 atau apabila pendaftaran mana-mana badan sukan dibatalkan atau digantung di bawah Akta ini, maka peruntukan yang berikut adalah terpakai:

- (a) badan sukan itu tidak boleh menganjurkan, menjalankan, membenarkan atau menyertai apa-apa aktiviti, termasuk pertandingan, acara atau forum yang sedang berlangsung bagi mana-mana sukan, sama ada di dalam atau di luar Malaysia;
- (b) badan sukan itu tidak boleh menerima atau terus menerima bantuan kewangan daripada Kerajaan, Majlis Sukan Negara atau mana-mana badan berkanun;
- (c) badan sukan itu tidak boleh menjadi anggota mana-mana badan atau organisasi yang bertindak sebagai atau berupa bertindak sebagai badan pengelola mana-mana sukan di Malaysia atau mewakili atau berupa mewakili peserta mana-mana sukan di Malaysia;
- (d) badan sukan itu tidak boleh menggunakan ungkapan "Malaysia" bagi mana-mana aktivitinya, atau apa-apa bentuk huruf atau tanda yang menunjukkan bahawa aktivitinya adalah dijalankan untuk, atas nama atau bagi pihak, Malaysia atau mana-mana bahagian Malaysia; dan

(e) badan sukan itu tidak boleh menganjurkan, menyertai atau menghantar peserta ke mana-mana pertandingan atau acara sukan dengan menunjukkan bahawa usahanya itu adalah untuk, atas nama atau bagi pihak, Malaysia atau mana-mana bahagian Malaysia, di dalam atau di luar Malaysia.

(2) Mana-mana pemegang jawatan yang melanggar subseksyen (1) adalah melakukan suatu kesalahan dan apabila disabitkan boleh didenda tidak melebihi lima ribu ringgit dan dalam hal kesalahan yang berterusan, boleh didenda tidak melebihi lima ratus ringgit sehari bagi setiap hari yang kesalahan itu diteruskan.

(3) Pesuruhjaya boleh, secara bertulis, menggantung kuasa subseksyen (1) berhubung dengan mana-mana badan sukan sehingga apa-apa takat dan selama apa-apa tempoh yang difikirkannya patut.

26. Peraturan-peraturan berkenaan dengan badan sukan.

Menteri boleh membuat apa-apa peraturan yang perlu berkenaan dengan badan sukan dan khususnya dan tanpa menjejaskan keluasan yang terdahulu, Menteri boleh membuat peraturan-peraturan untuk menetapkan—

- (a) prosedur bagi permohonan untuk pendaftaran dan pendaftaran badan sukan dan fee yang akan dikenakan bagi pendaftaran itu;
- (b) tugas, kuasa dan fungsi badan sukan;
- (c) prosedur bagi rayuan oleh badan sukan dan fee yang akan dikenakan baginya;
- (d) prosedur bagi pelantikan jurulatih, referi, pengadil dan hakim oleh badan sukan;
- (e) segala perkara berkaitan dengan pembubaran badan sukan dan pembatalan pendaftaran badan sukan; dan
- (f) kehilangan kelayakan pemegang jawatan badan sukan dalam hal keadaan tertentu.

BAHAGIAN VI
PANEL PENASIHAT SUKAN

27. Penubuhan Panel Penasihat Sukan.

Maka hendaklah ditubuhkan suatu panel yang hendaklah dikenali sebagai "Panel Penasihat Sukan" untuk menasihati Menteri tentang semua perkara yang dirujuk kepadanya oleh Menteri dan untuk menjalankan apa-apa fungsi yang ditetapkan oleh Menteri supaya dijalankan olehnya di bawah Akta ini.

28. Pelantikan anggota Panel Penasihat Sukan.

(1) Panel Penasihat Sukan hendaklah terdiri daripada anggota yang berikut yang hendaklah dilantik oleh Menteri:

(a) seorang Pengerusi; dan

(b) tidak lebih daripada lapan orang anggota lain, dua daripadanya hendaklah daripada calon yang dinamakan oleh Majlis Olimpik Malaysia.

(2) Pengerusi dan anggota Panel Penasihat Sukan hendaklah memegang jawatan bagi suatu tempoh yang tidak melebihi dua tahun dan adalah layak dilantik semula.

(3) Menteri hendaklah menentukan saraan dan terma-terma dan syarat-syarat lain bagi Pengerusi dan anggota Panel Penasihat Sukan.

(4) Menteri boleh mengisytiharkan jawatan Pengerusi atau mana-mana anggota Panel Penasihat Sukan sebagai kosong atas alasan bahawa dia didapati tak layak untuk terus memegang jawatannya atau tidak dapat melaksanakan tugas-tugas jawatannya.

(5) Pengerusi atau mana-mana anggota Panel Penasihat Sukan boleh meletakkan jawatannya pada bila-bila masa dengan memberikan notis bertulis kepada Menteri.

(6) Pada mana-mana prosiding Panel Penasihat Sukan, kuorum hendaklah terdiri daripada lima anggota, termasuk

Pengerusi, dan jika Pengerusi tiada, mana-mana anggota yang hadir pada prosiding itu bolehlah dilantik sebagai Pengerusi oleh anggota lain yang hadir.

29. Syor kepada Menteri.

Panel Penasihat Sukan, setelah mengadakan apa-apa siasatan yang difikirkannya perlu, hendaklah membuat apa-apa syor kepada Menteri berhubung dengan apa-apa perkara yang dirujuk kepada Menteri oleh Menteri di bawah Akta ini.

30. Kuasa Panel Penasihat Sukan untuk menghendaki pendedahan maklumat.

(1) Panel Penasihat Sukan boleh mengarahkan mana-mana orang supaya mendedahkan apa-apa maklumat kepada Panel dan mengemukakan apa-apa laporan dan dokumen dalam pengetahuannya atau dalam miliknya sebagaimana yang difikirkan perlu bagi maksud penjalanan mana-mana kuasa dan fungsinya di bawah Akta ini dan Panel boleh selanjutnya mengarahkan mana-mana orang yang difikirkannya perlu supaya hadir di hadapannya untuk membolehkannya menjalankan tugas dan fungsinya di bawah Akta ini.

(2) Mana-mana orang yang—

- (a) tidak mematuhi arahan Panel Penasihat Sukan di bawah subseksyen (1);
- (b) mendedahkan apa-apa maklumat yang diketahuinya adalah palsu; atau
- (c) mengemukakan laporan atau dokumen yang diketahuinya adalah palsu,

adalah melakukan suatu kesalahan dan apabila disabitkan boleh didenda tidak melebihi lima ribu ringgit atau dipenjarakan selama tempoh tidak melebihi enam bulan atau kedua-duanya.

31. Tiada tindakan boleh diambil terhadap Panel Penasihat Sukan.

Tiada tindakan atau prosiding undang-undang yang lain boleh diambil terhadap mana-mana anggota Panel Penasihat Sukan kerana apa-apa jua yang dilakukan atau ditinggalkan daripada dilakukan dengan suci hati berkaitan dengan penjalanan tugas dan fungsi Panel Penasihat Sukan di bawah Akta ini.

32. Peraturan-peraturan berkenaan dengan Panel Penasihat Sukan.

Menteri boleh membuat apa-apa peraturan yang perlu berkenaan dengan Panel Penasihat Sukan dan khususnya dan tanpa menjejaskan keluasan yang terdahulu, Menteri boleh membuat peraturan-peraturan—

- (a) untuk menetapkan prosedur yang hendaklah dipakai oleh Panel Penasihat Sukan dalam menguruskan apa-apa perkara yang dirujuk kepada di bawah Akta ini dan rekod-rekod yang hendaklah disimpan olehnya;
- (b) untuk menetapkan cara Panel Penasihat Sukan akan bersidang dan tempat di mana Panel Penasihat Sukan akan bermesyuarat;
- (c) secara amnya bagi penjalanan yang lebih baik akan tugas dan fungsi Panel Penasihat Sukan di bawah Akta ini.

BAHAGIAN VII

PELBAGAI

33. Kelulusan untuk menjadi tuan rumah pertandingan antarabangsa.

Tiada seorang pun boleh membuat tawaran untuk menjadi tuan rumah bagi apa-apa pertandingan atau acara sukan antarabangsa di Malaysia tanpa kelulusan bertulis Menteri terlebih dahulu dan keputusan Menteri tentangnya adalah muktamad.

34. Penggunaan kaedah dan garis panduan antarabangsa yang diiktiraf untuk pertandingan.

Sesuai badan sukan hendaklah memastikan bahawa semua pertandingan dan acara sukan yang dibenarkan, dijalankan atau disertai olehnya serta pertandingan dan acara sukan yang diadakan di bawah naungannya, adalah mengikut kaedah dan garis panduan yang diiktiraf oleh semua badan pengelola dan pengawalseliaan bagi sukannya dalam semua perkara, termasuk standard dan kelayakan semua peserta dan pegawai serta langkah kesihatan dan keselamatan bagi peserta, pegawai dan penonton di pertandingan atau acara itu.

35. Kelulusan Menteri dikehendaki bagi "Sukan Malaysia".

Seseorang tidak boleh, tanpa kelulusan bertulis Menteri terlebih dahulu, menganjurkan atau menjalankan apa-apa pertandingan atau acara yang melibatkan apa-apa sukan dengan menggunakan nama "Sukan Malaysia" atau mana-mana terbitan atau variasi nama sedemikian.

36. Syarikat hendaklah memohon untuk mendapatkan lesen untuk beroperasi.

(1) Sesuatu syarikat tidak boleh terlibat dalam apa-apa aktiviti sukan atau dalam apa-apa aktiviti lain yang berkaitan dengan sukan, yang ditetapkan oleh Menteri dalam peraturan-peraturan, melainkan jika ia dilesenkan untuk berbuat demikian oleh Pesuruhjaya.

(2) Lesen yang disebut dalam subseksyen (1) boleh dikenakan fee dan apa-apa syarat yang difikirkan oleh Pesuruhjaya patut dikenakan.

(3) Pesuruhjaya boleh, apabila berpuas hati bahawa ada alasan yang munasabah untuk berbuat sedemikian, membatalkan lesen yang dikeluarkan kepada suatu syarikat di bawah seksyen ini setelah memberi syarikat itu peluang untuk membuat representasi kepadanya.

37. Pindaan Jadual.

Menteri boleh, melalui perintah, menambah kepada, memotong daripada atau selainnya meminda Jadual sebagaimana yang difikirkannya perlu bagi maksud menguatkuasakan atau melaksanakan peruntukan Akta ini.

38. Peraturan-peraturan.

(1) Menteri boleh membuat apa-apa peraturan yang suai-manfaat atau perlu bagi maksud menguatkuasakan atau melaksanakan peruntukan Akta ini.

(2) Secara khususnya, tanpa menjejaskan keluasan kuasa yang diberikan oleh subseksyen (1), Menteri boleh membuat peraturan-peraturan bagi atau berkenaan dengan semua atau mana-mana perkara yang berikut:

- (a) borang yang hendaklah digunakan dan syarat-syarat yang hendaklah dipatuhi dalam memohon untuk didaftarkan atau dilesenkan di bawah Akta ini;
- (b) maklumat yang kena diberikan kepada Pesuruhjaya;
- (c) standard, spesifikasi dan kehendak teknikal bagi semua kemudahan sukan di Malaysia;
- (d) prosedur dalaman bagi penyelesaian pertikaian dalam badan sukan;
- (e) garis panduan bagi pengeluaran lesen kepada sesuatu syarikat; dan
- (f) menetapkan apa-apa jua yang boleh ditetapkan di bawah Akta ini.

(3) Mana-mana peraturan yang dibuat di bawah seksyen ini atau seksyen 26 boleh memperuntukkan bahawa apa-apa pelanggaran adalah suatu kesalahan dan boleh memperuntukkan pengenaan denda tidak melebihi lima ribu ringgit atau tempoh pemenjaraan tidak melebihi enam bulan atau kedua-duanya bagi kesalahan itu.

39. Kesalahan am.

Mana-mana orang yang melakukan kesalahan di bawah Akta ini yang baginya tiada penalti diperuntukkan secara khusus boleh, apabila disabitkan, didenda tidak melebihi lima ribu ringgit atau dipenjarakan selama tempoh tidak melebihi enam bulan atau kedua-duanya.

40. Perlindungan bagi orang dilantik, anggota jawatankuasa, dll.

Tiada seorang pun atau tiada seorang pun anggota sesuatu jawatankuasa yang dilantik oleh Menteri di bawah Akta ini atau mana-mana pegawai, pengkhidmat atau ejennya boleh didakwa di mana-mana mahkamah bagi apa-apa perbuatan yang dilakukan olehnya dengan suci hati dan dalam penjalanan apa-apa kuasa atau pelaksanaan apa-apa kewajipan di bawah Akta ini.

41. Kuasa am Menteri.

(1) Menteri boleh mengecualikan mana-mana orang daripada semua atau mana-mana peruntukan Akta ini apabila berpuas hati bahawa terdapat hal keadaan khas untuk berbuat demikian.

(2) Tertakluk kepada peruntukan Akta ini dan mana-mana peraturan yang dibuat di bawahnya, Menteri adalah pihak berkuasa yang muktamad berhubungan dengan sukan dan perkara yang berhubungan dengan sukan.

42. Peruntukan peralihan.

(1) Semua permohonan untuk pendaftaran sebagai pertubuhan yang menjalankan aktiviti yang hanya boleh dijalankan oleh suatu badan sukan dan semua permohonan untuk kelulusan oleh pertubuhan sedemikian di bawah Akta Pertubuhan 1966 yang belum selesai pada tarikh mula berkuatkuasanya Akta ini hendaklah, pada tarikh itu, terhenti diuruskan di bawah Akta itu dan hendaklah diuruskan di bawah peruntukan Akta ini.

(2) Apa-apa prosiding atau kausa tindakan yang belum selesai atau yang wujud sebelum sahaja tarikh mula berkuatkuasanya Akta ini di bawah Akta Pertubuhan 1966 boleh diteruskan atau dimulakan di bawah Akta itu seolah-olah Akta ini telah tidak diperbuat.

(3) Akta ini tidaklah menjejaskan liabiliti mana-mana orang untuk didakwa atau dihukum bagi kesalahan yang dilakukan di bawah Akta Pertubuhan 1966 sebelum tarikh mula berkuatkuasanya Akta ini, atau apa-apa prosiding yang dibawa atau hukuman yang dikenakan sebelum tarikh itu berkenaan dengan kesalahan itu.

43. Pencegahan anomali.

(1) Menteri boleh, melalui perintah, membuat apa-apa ubahsuaian dalam peruntukan Akta ini yang didapatinya perlu atau suaimanfaat bagi maksud menghapuskan apa-apa kesulitan yang disebabkan oleh mula berkuatkuasanya Akta ini:

Dengan syarat bahawa Menteri tidak boleh menjalankan kuasa yang diberikan oleh seksyen ini selepas habis tempoh dua tahun dari tarikh mula berkuatkuasanya Akta ini.

(2) Dalam seksyen ini, "ubahsuaian" termasuklah pindaan, tambahan, pemotongan, penggantian, adaptasi, variasi, perubahan dan ketakpakaian mana-mana peruntukan Akta ini.

JADUAL PERTAMA
(seksyen 2)

Aktiviti yang berikut adalah dikira sebagai sukan bagi maksud Akta ini:

1. Memanah
2. Olahraga
3. Sukan Air
4. Sukan Bermotor
5. Badminton
- 5A. Besbol
6. Bola Keranjang
7. Biliard dan Snuker
8. Bina Badan
9. Boling
10. Tinju
- 10A. Kanu
11. Kriket
12. Lumba Basikal
13. Sukan Ekuestrian
14. Lawan Pedang
- 14A. Kecergasan
15. Bola Sepak
16. Golf
17. Gimnastik
18. Bola Baling
19. Hoki
- 19A. Meluncur Ais
20. Judo
- 20A. Kabbadi
21. Karate Do
22. Boling Padang
- 22A. Seni Mempertahankan Diri
23. Bola Jaring
- 23A. Paralimpik
- 23B. Petanque
- 23C. Rekreasi

- 23d. Berdayung
24. Ragbi
25. Sepak Takraw
26. Menembak
- 26A. Silambam
27. Silat Olahraga
28. Tenis Ringan
29. Sofbol
30. Skuasy
31. Pingpong
32. Tae kwan do
33. Tenis
- 33A. Sukan Tradisional
34. Bola Tampar
35. Luncur Air
36. Angkat Berat
37. Gusti
38. Wushu
39. Kapal Layar

JADUAL KEDUA

(seksyen 19)

PERLEMBAGAAN DAN KAEDAH-KAEDAH BADAN SUKAN YANG BERTINDAK SEBAGAI BADAN PENGELOLA ATAU PEWAKILAN BAGI SUKANNYA DI PERINGKAT KEBANGSAAN

Perkara-perkara yang berikut hendaklah diperuntukkan dalam perlembagaan atau kaedah-kaedah:

1. Badan sukan hendaklah mempunyai tujuan dan matlamat yang berikut:
 - (a) untuk menggalakkan dan membangunkan sukannya;
 - (b) untuk mengekalkan hubungan baik dan kedudukan baik dengan badan pengelola dan pengawalseliaan antarabangsa bagi sukannya;

- (c) untuk memastikan bahawa perlembagaan dan kaedah-kaedahnya dipatuhi dan diikuti oleh semua anggotanya; dan
 - (d) untuk mengawal dan menjalankan bidang kuasa ke atas semua aktiviti berhubungan dengan sukannya di Malaysia dan oleh wakil Malaysia di luar negara.
2. Aktivitinya dijalankan tanpa ada diskriminasi tentang jantina, ras, warna kulit, agama, asal usul, bahasa, kecenderungan politik atau apa-apa pandangan lain yang dipegang oleh anggotanya.
3. Prosedur pemilihan bagi ahli sukan, pegawai, jurulatih dan mana-mana orang lain untuk mewakili Malaysia dalam sukannya adalah terbuka dan adil.
4. Akaun teraudit sepenuhnya serta laporan tentang segala aktivitinya dan penggunaan dan perbelanjaan semua wangnya bagi tahun kewangannya yang sebelumnya dikemukakan kepada Pesuruhjaya berserta dengan apa-apa laporan lain yang dikehendaki oleh Pesuruhjaya.

JADUAL KETIGA
(seksyen 19)

**PERLEMBAGAAN DAN KAEDAH-KAEDAH BADAN
SUKAN YANG LAIN DI BAWAH AKTA INI**

Perkara-perkara yang berikut hendaklah diperuntukkan dalam perlembagaan atau kaedah-kaedah:

1. Badan sukan hendaklah mempunyai tujuan dan matlamat yang berikut:
 - (a) untuk menggalakkan dan membangunkan sukannya;
 - (b) untuk mengekalkan hubungan baik dan kedudukan baik dengan semua badan pengelola dan pengawalseliaan antarabangsa bagi sukannya; dan
 - (c) untuk memastikan bahawa perlembagaan dan kaedah-kaedahnya dipatuhi dan diikuti oleh semua anggotanya.
2. Aktivitinya dijalankan tanpa ada diskriminasi tentang jantina, ras, warna kulit, agama, asal usul, bahasa, kecenderungan politik atau apa-apa pandangan lain yang dipegang oleh anggotanya.

3. Akaun teraudit sepenuhnya serta laporan tentang segala aktiviti dan penggunaan dan perbelanjaan semua wangnya bagi tahun kewangannya yang sebelumnya dikemukakan kepada Pesuruhjaya berserta dengan apa-apa laporan lain yang dikehendaki oleh Pesuruhjaya.

AKTA PEMBANGUNAN SUKAN 1997

(Akta 576)

SENARAI PINDAAN

<i>Undang-Undang yang meminda</i>	<i>Tajuk ringkas/Seksyen-seksyen yang dipinda</i>	<i>Berkuatkuasa dari</i>
PU (A) 170/1998	Perintah Pembangunan Sukan (Ubahsuaian) 1998 s. 16	1.4.1998
PU (A) 177/2000	Perintah Pembangunan Sukan (Pindaan) 2000 Jadual Pertama	26.5.2000
PU (A) 279/2004	Perintah Pembangunan Sukan (Pindaan) 2004 Jadual Pertama	13.8.2004